



KENYATAAN MEDIA MENTERI EKONOMI

15 Februari 2023

TUMPUAN MENAMBAH PENDAPATAN RAKYAT DALAM MENDEPANI CABARAN EKONOMI 2023

1. Malaysia mencatatkan pertumbuhan Keluaran Dalam Negara Kasar (KDNK) tahunan¹ sebanyak 8.7% dalam tahun 2022. Prestasi ekonomi ini adalah memberangsangkan dan mencerminkan daya tahan ekonomi negara.
2. Prestasi ekonomi mengikut sektor dan pertumbuhan bagi tahun 2022 adalah seperti berikut:

<i>Jenis aktiviti ekonomi</i>	Pertumbuhan tahunan	% Sumbangan ST4
Perkhidmatan	10.9%	58.6%
Pembuatan	8.1%	24.0%
Perlombongan & pengkuarian	3.4%	6.4%
Pembinaan	5.0%	3.5%
Pertanian	0.1%	6.3%

Jadual 1:

Pertumbuhan tahunan 2022 mengikut sektor dan sumbangan sektor pada ST4 2022

3. Pun begitu, pertumbuhan tahunan yang baik ini perlu dilihat bersama dengan pertumbuhan sukuan² dari ST1 2022 hingga ST4 2022 untuk memberi gambaran penuh prestasi ekonomi negara.
4. Pertumbuhan sukuan menunjukkan penurunan dari 3.8% (ST1), 3.5% (ST2), 1.9% (ST3) dan -2.6% (ST4) 2022.

¹ Pada harga malar)

² Pada harga malar

5. Suasana ekonomi global yang dijangka menyederhana dan tumbuh pada kadar yang lebih perlahan dalam tahun 2023 akan mempengaruhi prestasi ekonomi negara. Pertumbuhan ekonomi dunia dijangka lebih perlahan pada kadar 2.9% dalam tahun 2023 berbanding 3.4% dalam tahun 2022³.
6. Oleh itu, dalam keadaan pertumbuhan ekonomi global yang dijangka lebih perlahan dalam tahun 2023 dan pertumbuhan sukuan yang perlahan selama empat suku berturut-turut dalam tahun 2022, Kerajaan sedar keperluan untuk bersiap sedia menghadapi suasana ekonomi yang lebih mencabar.
7. Program-program ekonomi yang memberi fokus kepada dua perkara pokok ekonomi rakyat, iaitu kos sara hidup dan pendapatan, akan diberi tumpuan utama dalam perancangan ekonomi.
8. Kementerian Ekonomi juga meletakkan kedua-dua perkara ini sebagai fokus penambahbaikan dasar-dasar ekonomi negara dan program-program ekonomi rakyat yang mengambil pendekatan pelaksanaan bersepadu.
9. Dasar-dasar bersabit penggajian rakyat akan dibawa ke Majlis Tindakan Ekonomi Negara (MTEN) yang dipengerusikan Perdana Menteri supaya dasar negara diselaraskan ke arah satu sasaran pertumbuhan gaji yang menyeluruh kepada semua golongan pekerja. Mesyuarat pertama MTEN dijangka akan diadakan dalam bulan Mac 2023.
10. Kementerian Ekonomi akan melancarkan program Inisiatif Pendapatan Rakyat (IPR) yang bertujuan menambah pendapatan rakyat pada 26 Februari 2023. Sasaran pertama IPR adalah golongan miskin tegar dan keluarga B40 di seluruh negara.
11. Kementerian Ekonomi akan mengimbangi tumpuan untuk menstrukturkan ekonomi negara dengan keperluan ekonomi rakyat berhubung kos sara hidup dan gaji yang lebih baik dalam merangka perancangan ekonomi.

(RAFIZI RAMLI)
MENTERI EKONOMI

³ World Economic Outlook Update, Januari 2023 oleh IMF